

DI BESSÔI, DI BESSÔI, DI BESSÔI!

Il moviment autonomistic furlan, nassût subite dopo la liberazion, al è lâf indenant par plui di un an e mieç, cence cjatâ ni un consens plebissitari ni fuartis ostilitâts.

Adesions platonichis no i son mai mancjadis, simpatiis sintimentâls, sburtadis timidutis, aprovazions cun cualchi riserve a son capitadis simpri. E di chê altre bande cualchi reazion par opare di personis cressudis inte clime unitarie e patriotiche, nudridis di idealitâts nazionalistichis - personis, si capîs, in buine fede - a àn juste siervît a tignî impiade un fregul di polemiche in mût che il moviment no si stagnàs par mancjance di vite.

Si viôt che nol ispirave ni grandis sperancis intai simpatizants, ni grandis pôris intai contraris. Cualchi utopist isolât, cualchi sflameade momentanie in cheste direzion si jere simpri mostrade in Friûl, dal timp de conquiste veneziane in ca: ma a vevin lassât il timp che a vevin cjatât.

Cun di plui, in chest moment, l'ideâl autonomistic si presentave pôc unît, in gradazions e coloriduris diferentis che a lavin da un net separatisim, a un sclet federalisim, a une tardive riprese austro-file, massime a soreli jevât, a une gjeneriche mancjance di fede tal guvier talian, a une justificade aversion cuintri l'invasion e la preponderance foreste, o une prudente nostalgjie folcloriche o une lamie aspirazion al decentrament aministratîf.

Nol jere duncje il câs di spaventâsi, ni di strassâ cartatucjis cuintri di une ombre. Un fregul di virulence si jere mostrade cuintri di noaltris nome de bande dai fautôrs di une Regjon Julie dal Eneo ae Livence, cun Triest capitâl. Ma ancje alî la vôs dai furlans e varès vût pôc pês, tant di une bande che di chê altre: no faseve pôre.

Ma dut tun colp si à viodût che l'idee - dai e dai - a planc a planc e veve fate strade, e veve sfurducjât, sbisiât, fermentât, si jere slargjade. Adesions di personalitâts, di istituzions, di cualchi partît, mozions, articui sù pai sfueis, discussions, ordins dal "giorno" e, cun sorprese universâl, il vôt de Seconde Sotcomission de Constituent, a àn rivelade la fuarce di cheste idee e il risultât di une propagande che e pareve fate dibant.

E dal moment ancje la reazion e à mudât regjstro, e lengaç, e à scomençât a messedâsi, a fâsi sintî: e à gjavadis fûr de fodre lis sôs armis. No tant cu la propagande minude in mieç al popul furlan, che salacor e sarès tarde e inutil,

ma cul cjapâ di smire diretementi il centri, i umigns de Constituent, lis organizacions plui potentis, lis personalitâts plui influentis.

Ocjo furlans! Cumò no si trate plui di idealiscj unitaris, patriots de stampe viere: si trate di interès politics, industriâi, economics; si trate di mangjadoriis e di cadreghins. Industrie eletriche, Gjenio Civîl, Mutualitâts, Sindacâts, Magjastrât des aghis? Alc si sa, alc si capîs, alc si nûl, alc si scrupule... E chescj no molaran cussì pes matis: par une idee si scombat fintremai che nol coste trop, ma pal tacuin e pe cariere si ten dûr fintremai insom.

Un bon servidôr atîf, cuiet, fedêl, stupidut, cence pratesis, salt di comedons, di pocje spese e di buine rendite no si lu mole: si lu lusinghe, si lu spavente, si lu pare atôr, si cressi magari la paie, si prometi il mont inte sachete...

Vignesie si viôt in pericol se il Friûl si distache de sô aministrazion. Ce vuelial dî? Al vûl dî che intor dal Friûl e mangjave fuart, che a pierdilu e cjape un fregul di scopule. E alore l'interès dal Friûl al è contrari di chel di Vignesie.

Al è chel che o vîn simpri dit e predicjât. No nus fâs specie il Comitât "Salvare Venezia" che nol semee masse svelto, se al zuie cussì a cjartis scuvieris: nus fâs pôre l'ativitât soteranie, i caparaments, i mercimoniis che i interessâts no mancjaran di fâ sot vie.

E alore al tocje di butâsi fûr, di tacâ a fevelâ a fuart, di fâsi sintî a Rome. Rome no sint i sbisiaments, e sint il sunsûr, il taramot, il burlaç. Bisugne lâ in place, fâ la vôs gruesse, sberlâ intai conseis, intai comizis, intes ostariis, pardut: di bessôi, di bessôi, di bessôi!

josef marchet - Patrie dal Friûl 1947